



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE E O CONCELLO DE CAMBADOS PARA A INSTALACIÓN DO SERVIZO DE COMEDOR ESCOLAR NO CEIP SAN TOMÉ (CAMBADOS)

Cambados, 29 de setembro de 2020

REUNIDOS

Dunha parte, Román Rodríguez González, na súa condición de conselleiro de Cultura, Educación e Universidade, en virtude do seu nomeamento mediante o Decreto 112/2020, do 6 de setembro, no exercicio das atribucións que lle confire o artigo 34 a Lei 1/1983, do 22 de febreiro, reguladora da Xunta e a súa Presidencia e o artigo 3 do Decreto 138/2018, do 8 de novembro, polo que se establece a estrutura orgánica da Consellería de Educación, Universidade e Formación Profesional, en vigor mentres non se proceda ao desenvolvemento da estrutura contida no Decreto 110/2020, do 6 de setembro, polo que se establece a estrutura orgánica da Xunta de Galicia.

Doutra, Fátima Abal Roma, na súa condición de alcaldesa do Concello de Cambados, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local.

Ambas partes recoñécense a capacidade legal necesaria para formalizar este convenio de colaboración, consonte os principios de colaboración, cooperación, coordinación e eficacia que deben presidir as actuacións das administracións públicas, e

EXPOÑEN

I. O establecemento do servizo de comedor escolar no CEIP San Tomé (Cambados) para dar resposta ás demandas da comunidade educativa require a habilitación dos espazos necesarios nas condicións que permitan destinalos a comedor escolar do centro.



Segundo a relación valorada incorporada ao expediente, estas actuacións ascenden á contía de 120.000 euros en concepto do investimento nun inmovible de titularidade municipal adscrito ao uso educativo. No actual contexto de austeridade orzamentaria este importante desembolso económico non se pode levar a cabo sen a colaboración administrativa entre as administracións implicadas: a Consellería de Cultura, Educación e Universidade e o Concello de Cambados.

II. Os convenios entre as administracións públicas constitúen o instrumento adecuado para desenvolver a súa cooperación en cuestións de interese común, tal como establecen os artigos 47 e seguintes da Lei 40/2015, do 1 de outubro, de réxime xurídico do sector público, 57 da Lei 7/85, do 2 de abril, reguladora das bases de réxime local e 198 e seguintes da Lei 5/97, do 22 de xullo, de administración local de Galicia.

III. A lexislación de réxime local establece como unha das competencias propias dos concellos a conservación, mantemento e vixilancia dos edificios destinados a centros públicos de educación infantil, de educación primaria ou de educación especial.

Para estes efectos, e co fin de posibilitar a súa consecución real e efectiva, instrumentase este convenio dirixido ao cumprimento das obrigacións impostas pola normativa vixente. En virtude do exposto, ámbalas dúas partes acordan a súa subscrición de acordo coas seguintes

CLÁUSULAS

Primeira. **Obxecto**

O obxecto do presente convenio é articular as bases de colaboración entre a Consellería de Cultura, Educación e Universidade e o Concello de Cambados para levar a cabo o acondicionamento dos espazos necesarios para o establecemento do servizo de comedor escolar do CEIP San Tomé.



Segunda. **Orzamento**

O importe destas actuacións ascende á contía de 120.000 euros (IVE incluído) que corresponde á execución da obra e comprenderá todos os gastos que derivan dela, incluídos os da dirección e de seguridade e saúde.

Terceira. **Financiamento**

Os gastos correspondentes á realización das obras, incluídos os derivados da dirección facultativa e da coordinación da seguridade e saúde laboral, serán financiados pola Consellería de Cultura, Educación e Universidade e o Concello de Cambados, de acordo coas achegas que se indican:

Institución	Importe	Aplicación orzamentaria
Consellería	60.000	10.10.422A.632.1.04
Concello	60.000	2020.3230.62208

Se na fase de execución da obra os custos incluídos nesta cláusula resultan incrementados, as partes financiarán o incremento na mesma proporción na que participan.

Cuarta. **Obrigas da Consellería de Cultura, Educación e Universidade**

A consellería, a través da súa xefatura territorial, levará a cabo a licitación, dirección, execución e recepción das obras obxecto deste convenio, que non poderán superar a contía de 120.000 euros.

A consellería achegará 60.000 euros do custo da obra con cargo ao crédito desconcentrado na Xefatura Territorial de Pontevedra, e quedará obrigada a destinar os fondos percibidos do Concello de Cambados ao financiamento do obxecto deste convenio, recollido na súa cláusula primeira.



Quinta. ***Obrigas do Concello de Cambados***

O concello concederá as autorizacións que fosen precisas e asumirá para este fin a redacción da documentación técnica necesaria. Así mesmo, achegará as subministracións básicas necesarias (abastecemento de auga, saneamento e electricidade) para a prestación do servizo de comedor nas instalacións.

O concello financiará 60.000 euros do custo da obra mediante a achega das cantidades correspondentes, a cuxo efecto se compromete á súa inclusión nos seus orzamentos e renuncia a reter da aportación da corporación calquera tipo de tributo con motivo das obras.

Como requisito previo á licitación da obra e no prazo máximo de tres meses desde a entrada en vigor do Convenio, o aboamento da achega do Concello, na cantidade sinalada na cláusula terceira, farase efectivo á Consellería de Cultura, Educación e Universidade, mediante ingreso na conta xeral da Xunta de Galicia, c/c. ES82 2080 0300 8731 1006 3172 indicando o concepto e referencia do Convenio.

Correspóndelle ao Concello asumir o mantemento e a conservación das instalacións dende o día seguinte ao da formalización da acta de recepción das obras.

Sexta. ***Comisión de seguimento e control***

Créase unha comisión mixta de carácter paritario entre as dúas institucións asinantes para o seguimento e control do cumprimento deste convenio e para propoñer a resolución das dúbidas de interpretación e das controversias derivadas da súa execución. A comisión estará integrada por tres persoas en representación da consellería e outras tres en representación do concello. A presidencia corresponderá a unha das persoas representantes da consellería. Esta comisión reunirse no prazo de tres días contados dende a petición expresa de calquera das partes.

Sétima. ***Vixencia do convenio***



O presente Convenio entrará en vigor na data da súa sinatura e terá vixencia ata o 31 de decembro de 2020. A vixencia do presente convenio poderá prorrogarse coa conformidade expresa das partes intervenientes no caso de que non se rematasen as obras previstas nel.

Oitava. **Resolución**

Ademais da expiración do seu prazo de vixencia, serán causas de extinción do convenio o mutuo acordo das partes asinantes ou a decisión unilateral dunha parte por incumprimento da outra parte ou porque existen causas excepcionais e xustificadas que dificulten ou obstaculicen o cumprimento das estipulacións que constitúen o seu contido, previa denuncia cun prazo de dous meses de antelación. Así como por decisión xudicial declaratoria da nulidade do convenio, conforme ao artigo 51 da Lei 40/2015, do 1 de outubro, de réxime xurídico do sector público.

Novena. **Xurisdición**

O presente convenio ten natureza administrativa. As partes quedan sometidas á xurisdición contencioso-administrativa, a falta de entendemento previo pola comisión citada na cláusula sexta, para a resolución das posibles controversias sobre a interpretación e o cumprimento do convenio.

En proba de conformidade con canto antecede, asinan este convenio por triplicado exemplar no lugar e data arriba indicados.

Pola Consellería de Cultura, Educación
e Universidade

Polo Concello de Cambados

Román Rodríguez González

Fátima Abal Roma